



Inatsisartunut ilaasortaq Malik Berthelsen, Siumut

Innuttaasunut nappaammik ilungersunartumik napparsimalersimasunut pisortanit ikiorsiissutit pillugit § 37-kut apeqquteqaammut tunngasoq

10. januar 2011
Sullapnr. 2011-043935
All. Upp. Nr. 536280

Asasara Malik Berthelsen.

Postboks 260
3900 Nuuk
Oqa. (+299) 34 50 00
Allak (+299) 34 66 66
E-mail: in@nanoq.gl
www.nanoq.gl

Innuttaasunut nappaammik ilungersunartumik napparsimalersimasunut pisortanit ikiorsiissutit pillugit apeqquteqaaternut qujanaq

Apeqquteqaatinik tulleriinnik marlunnik saqqummiussisimavutit:

1. Nappaammik ilungersunartumik napparsimalersimaneq pissutigalugu assersuutugalugu kræftilersimatilluni, katsorsartinnerup nalaani sulisinnaajunnaarnermi akiligassanut sutigut pisortanit ikiuinissaq periarfigissavaa?
2. Taamaattoqartillugu akiligassatigut ikiuniarnermi, apeqqutaatinnegartarnerluni nappaammik eqqorneqartoq namminerisamik illumik inissiamilluunniit pigisaqarnersoq imaluunniit pisortat inissiaataanni najugaqarnersoq?

1-mut.

Innuttaasunut isumaginninnermut tunngasutigut soorlu napparsimalersimanikkut eqqugaasimasunut, taamaasillunilu pisariaqartitanik imminut ilaqtallu pilersornissaannut aningaasartuutinullu aalajangersimasunut pissarsisinnaannginnermut tassanngaannartumik pisariaqartitsilernermit pisortanit ikiorsiissutinik pisartagaqalertitsisoqarsinnaavoq. Tamanna Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersumit § 7-mi takuneqarsinnaavoq. Qinnuteqartup inuuniarnikkut eqqugaasimaneranut naliliiniarnermi aalajangiisuussaaq, innuttaasoq inuuniarnikkut allannguuteqartoqarsimansoq, allannguullu taanna, innuttaasup imminut ilaqtaminullu pilersuisinnaajunnaarneranut pissutaanersoq.

Pilersuinissamat aningaasartuutinullu aalajangersimasunut, kiisalu aningaasartuutinut ataasiakkaanut pisortanit ikiorsiissutinik pisartagaqalertitsisoqarsinnaavoq, innuttaasup § 7-mi piumasaqaatit naammassinerisa saniatigut, napparsimaguni taamaattumillu sulifeqalernissamat piareersimanani. Tamanna takuneqarsinnaavoq § 8-mi Pisortanit ikiorsiissutit pillugit Inatsisartut peqqussutaat nr. 15, 20. november 2006-meersumi. Taamaallunni nerissanut, kiassarnermut, atisanut assigisaanullu aningaasartuutinut pisortanit ikiorsiisoqarsinnaavoq.

Inuk nappaammik katsorsartinneq pissutigalugu sulisinnaajunnaarsimasoq, inuup pineqartup tamakku pillugit inatsisartut peqqussutaanni piumasaqaatit naammassisimagunigit, pisortanit ikiorsiissutinik pisartagaqalersinnaavoq. Pisortanit ikiorsiissutit pillugit inatsisartut peqqussutaanni immikkoortoq 2-mut pisortanit ikiorsiissutinik pisartagaqalernissamat piumasaqaatinut nalinginnaasunut innersuussisoqassaaq, aalajangersimasumik

najugaqarnermut, Kalaallit Nunaanni inuit allattorsimaffiannut allatsissimanissaq, danskit naalagaaffiani innuttaassuseqarneq il.il. pillugit piumasaqaatit ilanngullugit. Nappaateqarnermut piumasaqaatit innuttaasumit qanoq eqquutsinneqarneri nakorsamit nalilersorneqartarput.

Malugeqquneqarpoq, innuttaasup ataavartumik inuussutissarsiorsinnaassuseqarnera annikillismappat timikkut tarnikkut isumaginninnermut tunngasutigut tunngavilinnik, innuttaasup siusinaartumik pensionisiaqarnissamut piumasaqaatit naammassisimagunigit, siusinaartumik pensionisianik tunineqarsinnaasoq. Siusinaartumik pensionisiat pillugit Inatsisartut peqqussutaat nr. 4, 7. maj 2007- imeersumi §§ 1-6-mut innersuussisoqassaaq.

Aammattaaq malugeqquneqarpoq, innuttaasoq napparsimanagerup nalaani akissarsiaqarnissaminut pisinnaatitaaffeqarsinnaasoq, innuttaasup atorfinitsinneqarnermigut periarfissaqarpat. Kiisalu innuttaasoq napparsimanagerup nalaani suliffeqanngikkallarnermi ikiorsiissutinik pisartagaqarnissamut pisinnaatitaaffeqarsinnaasoq, innuttaasoq sapaatip akunnerini 13-ini akissarsialittut suliffeqarsimaguni piffissamilu tassani minnerpaamik akunnerit 182-it sulisimaguni. Suliffeqanngikkallarnermi ikiorsiissutinik tigusagaqartarnissamut piumasaqaatinut suliffeqanngikkallarnermi ikiorsiissutit pillugit Inatsisartut peqqussutaat nr. 5, 1. juni 2006-imeersunut innersuussisoqassaaq, taakkualu ataani pingaartumik § 4-mut.

2-mut.

Pisortanit ikiorsiissutinik pissagaanni piumasaqaataavoq Inatsisartut peqqussutaat nr. 15, 20. november 2006-imeersoq malillugu, innuttaasoq imminut ilaqtaminullu inuuneq ingerlatiinnarniarlugu pisariaqartitanik pilersuisinnaanngikkaangat. Tamanna § 3-mi takuneqarsinnaavoq.

Nappaatip kingunerisaanik innuttaasup aningaasaqarniarnera annertuumik allangortineqassappat, innuttaasoq inissiami najugaqartoq, appasinnerusumik isertitanik isertitaqarnissamut ilimagisat tunuliaqutsiullugit, ineqarnermut tapiissummik qinnuteqarsinnaavoq, inissiani attartortittakkani ineqarnermut tapiissutit pillugit inatsisartut peqqussutaat nr. 3, 31. maj 2001-imeersumi § 5 takuuk.

Inuttaasoq, piginneqatigiilluni illuutileqatigiinni imaluunniit nammineq pigisamini inigisagaruni, ineqarnerminut akiligassanut matussutissanik aningaaserivimmut atorniartariaqarpoq, aalajangersimasumik aningaasartuutitut pisortanit ikiorsiissutaasinnaasut qaa-vatigut ineqarnermut akiligassanut. Ikiorsiissutit taamaattut pisortanit utertitassanngorlugit ikiorsiissutaasinnaanngillat.

Inussiarnersumik inuulluaqqusillunga

Maliina Abelsen

